

ಪೌಲನು ಗಲಾತ್ಯದವರಿಗೆ ಬರೆದ ಪತ್ರಿಕೆ ಪೌಲಾನಿ ಗಲಾತ್ಯಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ವಳಕ್

ಗಲಾತ್ಯಾತ್‌ಲ್ಯಾನಾ ಲಿವ್‌ಲ್ಯಾ ಪತ್ರ ಅಪೊಸ್ತಲ್ ಪೌಲಾನಿ ಲಿವ್‌ಲ್ಯಾ 1:1 ಹ್ಯ ಪತ್ರ ಪೌಲಾನಿ ಗಲಾತ್ಯಾತ್ಲೆ ಸಭೆನಾ ಕ್ರಿಸ್ತ ಜಲಾಮ್‌ಲ್ಯಾವ 48-57 ವರ್ಸಾಂಚೆ ಮದ್ಲಿ ಲಿವ್‌ಲ್ಯಾ ಗಲಾತ್ಯಾತ್ಲಿ ರೊಮ್ ಸಾಮರಾಜಾಚಾ ಗಲಾತ್ಯ ಮಂಥ್ಯಾಲ್ಯಾ ಪ್ರಾಂತ್ಯಾತ್ ಜೀವ್ನಾ ಕರಿತಿತ. ಹ್ಯ ಪತ್ರ ಲಿವ್ತಾನಾ ಪೌಲ್ ಕುರ ಹುತ್ತಾ ಮನ್ವುನ್ ವಿದ್ವಾಂಸಾನಾ ಖಾತ್ರಿ ಜಾಲ್ಲ್ಯಾ ನಾಹಿ. ಫನ್ ಎಫೆಸಾ ಆನಿ ಕೊರಿಂಥ ಹ್ಯಾ ದುನಿ ಪೆರತ್ಲಿ ತ್ಯೊ ರಾಯ್ಲಾ ಆಸಲ್.

ಪೌಲಾನಿ ಹ್ಯ ಪತ್ರ ಗಲಾತ್ಯಾತ್‌ಲ್ಯಾ ಸಭೆನಾ ಯೆಹುದಿ ಆನಿ ಯೆಹುದಿ ನಸ್‌ಲ್ಯಾಲ್ಯಾ ಇಸ್ವಾಸಿಂಚಾ ಉದೆಸಾನಿ ಲಿವ್‌ಲ್ಯಾ ತ್ಯೊ ಖುಬ್ ಕರುನ್ ಇಸ್ವಾಸಿ ಭುನ್ಯಾ ಕರಾರಾತ್ ಯೆಹುದ್ಯಾಂಚಾ ನೆಮಾ ಶಾರ್ಕ್ ಚಾಲಾಯಾ ವ್ಹಯಿ ಲ ಕರುನ್ ಮುಂಜಿ ಕರುನ್ ಗಿಹ್ಯಾ ವ್ಹಯಿ ಮಂಥ್ಯಾಲ್ಯಾ ಲಬಾಡ್ ಸಾಂಗ್‌ನ್ಯಾಚೆ ಆಡ್ಲಿ ಲಿವ್‌ಲ್ಯಾ ಇಸ್ವಾಸಿಂಚೆ ಮದ್ಲಿ ಯೆಹುದಿ ಮಂಥ್ಯಾಲ್ಯಾ ಯೆಹುದಿ ನಸ್‌ಲ್ಯಾಲ್ಯಾ ಇಸ್ವಾಸಿನಾ ಮುಂಜಿ ಕರಾಯಾ ವ್ಹಯಿ ಮನ್ವುನ್ ಸಾಂಗ್‌ತ್ಯಾಲಾ ಯೊಕ್ ತಂಡಾ ಹುತ್ತಾ. ತೇ ಪೌಲಾಚಾ ಅಪೊಸ್ತಲಾಚೆ ಅಧಿಕಾರ್ಯಾಚೆ ಗುಶ್ಟಿತ್ ಪ್ರಶ್ನೆ ಸಾಹಿತ್ ಕೆಲ್ತಾ. ಪೌಲ್ ಆಪ್ಲಿ ಕ್ಯಾಯ್ನಿ ಸಾಂಗಿತ್ ಅಪೊಸ್ತಲಾಂಚೆ ಗುಶ್ಟಿತ್ ಉತ್ತರ ದೇತೊ. 1:11— 2:14 ಆನಿ ಯೇಸು ಕ್ರಿಸ್ತಾಪ ಆಸ್‌ಲ್ಯಾಲ್ಯಾ ಇಸ್ವಾಸಾನಿ ತ್ಯವ್ಹಿಸ್ ಸುಟ್ಕುಕ್ ಗಾವ್ನಾರ್ ಮನ್ವುನ್ ವಿವರನಾ ಸಾಂಗಿತ್ ಬರಿ ಖಬರಿಚ್ ಉತ್ತರ್ ದೇತೊ 2:16 ಹ್ಯ ಮಾನ್ವಾಪ್ಪಿ ನವ್ವತ ದೇವಾನಿ ದ್ಯಾವ್‌ಲ್ಯಾಲ್ಯಾ ಕನಿಕರಾಚ್ ಯಾಕ್ ಪ್ರತಿ ಫಳ್ ಜಾಲ್ಯಾ.

ಪಿರಿಕೆ

1. ಪೌಲ್ ಗಲಾತ್ಯಾತ್ ಆಸ್‌ಲ್ಯಾಲ್ಯಾ ಸಭೆನಾ ಸ್ವಾಗತ್ ಕರಿತ್ ಪತ್ರ ಸುರ್ವಾತ್ ಕರ್ತೊ 1:1-5
2. ಪೌಲ್ ಆಪ್ನು ಧರ್ಮಶಾಸ್ತ್ರಾರ ಶಾರ್ಕ ಜೀವ್ವಾ ಕರಾಯಾ ಯತ್ನ ಕಿಲಿತ ಫನ್ ತ್ಯ ಉಪೇಗ್ ಜಾಲ್ತಾ ನಾಹಿ ಮನ್ವನ್ ಸಾಂಗಾಯಾ ಆನಿ ಸಿಕ್ವಾಯಾ ಆಪ್‌ಲ್ಯಾ ಜೀವ್ವಾಚಾ ಥೊಡ್ಯಾ ಖನ್ಕತಿ ವಿವರನ್ ಕರ್ತೊ 1:6—2:21
3. ನಂತರ್ ತ್ಯೊ ಧರ್ಮಶಾಸ್ತ್ರಾರಾಚ್ ಪಾತ್ರ ಆನಿ ಸುಟ್ಕುಕಿಚಿ ಕ್ರಪೆಚೆ ಗುಚ್ಚಿತ್ ವಿವರನ್ ಕರ್ತೊ. 3—4
4. ನಂತರ್ ತ್ಯೊ ಚಾಂಗ್ಲಾ ಕ್ರಿಸ್ತಾಚಾ ಜಿವ್ವಾ ಕರಾಯಾ ಥೊಡ್ಯಾ ಸುಸ್ವಾ ದೇತೊ. 5:1—6:10
5. ಮುಂಜಿ ಕರುನ್ ಗೆಡ್ಯಾಲಿ ಬಾಹಿರ್ಯಾ ನೆಮಾವ್ನಿ ಯಕಾ ನವ್ಯಾ ಮಾನ್ಸಾಪಾ ದೇವಾನಿ ಆನ್‌ಲ್ಯಾಲಿ ಬದಲಾವನೆ ಯದತ್ ಥೆವಾಯಾ ಇನಂತಿ ಕರ್ತೊ ಆನಿ ನಮಸ್ಕಾರ್ ಸಾಂಗಿತ್ ಆಪ್ಲ ಪತ್ರ ಸುಪಿವ್ತೊ. 6:11-18

¹ ಮಾನ್ಸಾಪ್ಪಿ ವ್ಹವುನಿ ಮಾನ್ಸಾಚಾ ಅಧಿಕಾರಾನಿ ವ್ಹವುನಿ ಅಪೊಸ್ತಲ್ ವ್ಹಯಾಚೆ ಆಂದಿ ಯೇಸು ಕ್ರಿಸ್ತಾಸ್ ಲಾಗುನ್ ಆನಿ ತ್ಯಲಾ ಮೇಲ್ಯಾಲ್ಯಾತ್ಲಿ ಉರಿವಲ್ಯಾಲ್ಯಾ ಬಾ ಜಾಲ್ಯಾಲ್ಯಾ ದೇವಾಪ್ಪಿಬಿ ಥರಿವ್‌ಲ್ಯಾಲಾ ಅಪೊಸ್ತಲ್ ಪೌಲ್ ಮಂಥ್ಯಾಲಾ ಮಿ

² ಆನಿ ಮಾಜೆ ಸಂಗ ಆಸ್‌ಲ್ಯಾಲಿ ಭನ್ಡಿ ಬಾಹು ಸಗ್ಳೆ ಗಲಾತ್ಯಾತ್ ಆಸ್‌ಲ್ಯಾಲೆ ಸೆಭೆಲಾ ಲಿವಾಚ್ ಕ್ಯಾ ಮಂಜೆ:

³ ಬಾ ಜಾಲ್ಯಾಲ್ಯಾ ದೇವಾಪ್ಪಿ ಆಮಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಪ್ಪಿ ತುಮಾನಾ ಕ್ರಪಾ ಶಾಂತಿ ವ್ಹವುನಿ.

⁴ ತ್ಯನಿ ಆಮಾನಾ ಆತಾಚಾ ಬುರ್ಶಾ ಕಾಲಾತ್ಲಿ ಸೊಡ್ವಾಯಾ ವ್ಹಯಿ ಮನ್ವನ್ ಬಾ ಜಾಲ್ಯಾಲ್ಯಾ ದೇವಾಚಾ ಮನಾಚೆಗತ್, ಆಮ್ಚಾ ಪಾಪಾಸ್ ಲಾಗುನ್ ಆಪ್‌ಲ್ಯಾಲಾ ಮರ್ನಾಚಾ ತಾಬ್ಯಾತ್ ದಿಲಾ.

⁵ ದೇವಾಲಾ ಖಾಯಿಮ್ ಮೈಮೆ ವ್ಹವುನಿ. ತಸಸ್ ವ್ಹವುನಿ.

ಎಕುಸ್ ಬರಿ ಖಬರ್

6 ಕ್ರಿಸ್ತಾಚೆ ಕ್ರಪೆನಿ ತುಮಾನಾ ಹಾಕಟ್‌ಲ್ಯಾಲ್ಯಾಲಾ ಸುಡುನ್, ಯವ್ಚೆ ಬಿಗಿ ದುಸ್ರೆ ಖಬರಿಕ್ಡ ತುಮಿ ಪರಾತ್‌ಲ್ಯಾಸಾ ಮನ್ವುನ್ ಮನಾ ಆಜಾಬ್ ವಾಟ್ಚ್ಯಾ.

7 ಖರ್ಚ್ಯಾನಿಸ್ ದುಸ್ರಿ ಖಬರ್ ನಾಹಿ, ಫನ್ ಥುಡಿ ಜನ ತುಮ್ಮಿಪ ಬೇದ್ವಾವ್ ಗಾಲ್ವುನ್ ಕ್ರಿಸ್ತಾಚಿ ಖಬರ್ ಬದ್ಲಾಯಾ ಯತ್ನ ಕರ್ತಾಯ್.

8 ಫನ್ ಆಮಿ ತುಮಾನಾ ಸಾಂಗ್‌ಲ್ಯಾಲೆ ಖಬರಿಲಾ ಆಡ್ವಾ ಜಾಲ್ಯಾಲ, ಆಮಿಸ್ ವ್ಹವುನಿ ನಾಹಿತ ಸ್ವರ್ಗಾತ್ಲಿ ಆಲ್ಯಾಲಾ ದೇವ್ ದುತ್ ವ್ಹವುನಿ, ತುಮಾನಾ ಸಾಂಗ್ತ ತ್ಯಲಾ ಸರಾಪ್ ಲಾಗುನಿ

9 ಆಮಿ ಆಂದಿ ಸಾಂಗ್‌ಲ್ಯಾಚೆಗತುಸ್ ಆತಾಬಿ ಮೀ ಪರ್ತುನ್ ಸಾಂಗ್ತೊ. ತುಮಿ ಗೆತಲ್ಯಾಲೆ ಖಬ್ರಿಲಾ ಆಡ್ವ ಆಸ್‌ಲ್ಯಾಲ ಕೊನ್ದರಿ ತುಮಾನಾ ಸಾಂಗ್ತ ತ್ಯಲಾ ಸರಾಪ್ ಲಾಗುನಿ.

10 ಆತಾ ಮೀ ಕುನಾಲಾ ಮಿಳ್ವುನ್ ಗೆತೊ? ಮಾನ್ಸಾನಾ ಕ್ಯಾ ದೇವಾಲಾ? ಮೀ ಮಾನ್ಸಾನಾ ಆವ್ಡಾಯಾಸಾಟಿ ಯತ್ನ ಕರ್ತೊ ಕ್ಯಾ? ಆಜುನ್ ಮಾನ್ಸಾನಾ ಆವ್ಡಾಯಾ ಕೆಲ ಆಸ್ತತ್ ಮಿ ಕ್ರಿಸ್ತಾಚಾ ಸೇವಕ್ ವ್ಹವುನ್ ರಾಹಿತ್ ನವ್ಚೊ.

ಅಪೊಸ್ತಲ್ ವ್ಹಯಾಲಾ ಹಾಕಟ್‌ಲ್ಯಾಲ

11 ಬನ್ದಿ ಬಾವ್ತಾನ್, ಮೀ ಸಾಂಗ್‌ಲ್ಯಾಲೆ ಖಬರ್ ತರಿ ನಿಸ್ಕಿ ಮಾನ್ಸಾಪ್ಪಿ ಆಲ್ಯಾಲಿ ನವ್ಡ ಮನ್ವುನ್ ತುಮಿ ಸಮಜುನ್ ಗಿಹ್ಯಾ ವ್ಹಯಿಸಾ ಮನ್ವುನ್ ಮಂತ್ಲೊ.

12 ಮೀ ತ್ಯ ಮಾನ್ಸಾಪ್ಪಿ ಗೆತ್ಲ ನಾಹಿ, ಮನಾ ಕುನಿ ಸಾಂಗ್ಲ ನಾಹಿ, ಫನ್ ಯೇಸು ಕ್ರಿಸ್ತಾಪ್ಪಿಸ್ ತ್ಯ ಮನಾ ಸಮಾಜ್

13 ಆಂದಿ ಮಿ ಯೆಹುದಿಂಚೆ ಸಿಕ್ವೆತ್ ಆಸ್ತಾನಾ ಮಾಜ್ ಭಾಲ್ವ ಕಸ್ಲ ಮನ್ವುನ್ ತುಮಿ ಐಕ್ಲಸಾ. ಆಮಿ ದೇವಾಚಿ ಸಭಾ ಖುಬ್ ತರಾಸ್ ದಿವುನ್ ಹಾಳ್ ಕರೀತೊ.

14 ಯವ್ಡ್ ನವ್ಡ ಮಾಜಾ ವಡ್ಲಾಂಚಿಪ್ಪಿ ಆಲ್ಯಾಲಿ ಪದ್ಧತಿಚೆ ಗುಪ್ತಿತ್, ಮಾಜೆ ವಯೆಚಾ ಮಾನ್ಸಾಪ್ಪಿ ಯೆಹುದ ದರ್ಮಾತ್ ಖುಬ್ ಹುರುಪ್ ಆಸ್‌ಲ್ಯಾಲಾ ಜಾಲ್ತೊ.

15 ಫನ್ ಮಿ ಮಾಜಿ ಆಯಿಚಾ ಪೊಟಾತ್ ಆಸ್ಥಾನಾ ನಿವ್ವನ್ ಆಪ್ಲೆ ಕ್ರಪೆನಿ ಸೆವೆತ್ ಹಾಕಟ್‌ಲ್ಯಾಲ್ಯಾ ದೇವಾನಿ,

16 ಆಪ್‌ಲ್ಯಾ ಲೇಕಾಚಿ ಖಬರ್ ಇಸ್ವಾಸ್ ನಸ್‌ಲ್ಯಾಲ್ಯಾನಾ ಸಾಂಗಾಯಾ ವ್ಹಯಿ ಮನ್ವುನ್ ದೇವಾಚಿ ಚಿತ್ ಭಾಲ್ಲ್ಯಾ ಮಿ ತವಾಸ್ ಮಾನ್ವಾಂಚಿ ಯವಜ್ಞಾ ಐಕಾಚಿ ಆಂದಿ.

17 ಯೇರುಸಲೇಮಿತ್ ಮಾಜಿ ಆಂದಿ ಅಪೊಸ್ತಲ್ ಭಾಲ್ಯಾಲ್ಯಾಂಚಿಪಬಿ ಭಾಯಾಚಿ ಆಂದಿ ಅರಬ ದೆಶಾತ್ ಭಾವುನ್ ಪರ್ತುನ್ ದಮಸ್ಕು ಪೆರತ್ ಆಲೊ.

18 ತೀನ್ ವರ್ಸ ಭಾಲ್ಯಾವ ಪೇತ್ರ ವಳಕ್ ಕರುನ್ ಗಿಹ್ಯಾ ವ್ಹಯಿ ಮನ್ವುನ್ ಯೇರುಸಲೇಮಿತ್ ಭಾವುನ್ ತ್ಯಚಿಪ ಪಂದ್ರಾದೀಸ್ ಹುತ್ತೊ.

19 ಫನ್ ಪ್ರಭುಚಾ ಬಾಹು ಭಾಲ್ಯಾಲಾ ಯಾಕೊಬಾಲಾ ಸುಡುನ್ ಅಪೊಸ್ತಲಾತ್ ದುಸ್‌ರ್‌ಲ್ಯಾ ಕುನಾಲಾಸ್ ಮೀ ಬಗ್ಲಾ ನಾಹಿ.

20 ಮೀ ತುಮಾನಾ ಲಿವ್‌ತ್ಯಾಲ್ಯಾ ಗುಶ್ಟಿ ಲಬಾಡ್ ನವ್ತ ಮನ್ವಾಯಾ ಹಬಕ್, ದೇವುಸ್ ವಳಕ್.

21 ನಂತರ್ ಸಿರಿಯಾ ಆನಿ ಕಿಲಿಕ್ಯ ಸಿಮತ್ ಗೆಲೊ.

22 ಫನ್ ಕ್ರಿಸ್ತಾಪ ಆಸ್‌ಲ್ಯಾಲೆ ಯುದಾಯಾಚೆ ಸಬೆಲಾ ಆಘುನ್ ಮಾಜಿ ವಳಕ್ ನವ್ಲೆ.

23 ಪೈಲ್ಯಾ ಕಾಲಾತ್ ಆಮ್ಚಿ ನಿಂದಾ ಕೆಲ್ಯಾಲಾ. ಆಪ್ಲು ಹಾಳ್ ಕರ್ತ್ಯಾಲಾ ಇಸ್ವಾಸ್ ಆತಾ ಸಾಂಗ್‌ತ್ಯೊ ಮನ್ಯಾಚಿ ಖಬರ್ ತ್ಯಂಚಾನಿ ಐಕ್ಲಿ.

24 ಮಾಜಿ ಸಂಗ ದೇವಾಲಾ ವವ್ಯಾಳಾ.

2

ಪೌಲ್ ಆನಿ ಉರಲ್ಯಾಲ ಅಪೊಸ್ತಲ್

1 ಚೌದಾ ವರ್ಸಾಚೆ ನಂತರ್ ಮಿ ಬಾರ್ನಾಬಾಚೆ ಸಂಗ ತೀತಾಲಾ ಸಾಹಿತ್ ಗಿಹುನ್ ಆನಿ ಯಂಗ್ಡಾಯೆರುಸಲೇಮತ್ ಗೆಲೊ.

2 ದೇವಾಚಾ ಹುಕ್ಮಾನಿ ಜ್ಞಾಪುನ್ ಯೆಹುದಿ ನಸ್‌ಲ್ಯಾಲ್ಯಾ ಲೊಕಾನಾ ಮಿ ಸಾಂಗ್‌ತ್ಯಾಲಿ ಬರಿ ಖಬರ್ ಕ್ಯಾ ಮನ್ಯಾಚಿ ಜಾಂತ್ಯಾನಾ ಯಕಾನ್ಸಿ ಸಾಂಗ್ಲೆ ಕಾಮಂಜೆ ಮೀ ಬರೆ ಖಬರಿಸಾಟೆ ಖಾಲ್ಯಾಲಿ ಖಟ್ಟಟ್ ಆತಾ ಖಾತ್ಯಾಲಿ ಖಟ್ಟಟ್ ಉಗಸ್ ವ್ಹವು ನಾಹಿ ಮನ್ವುನ್ ಸಾಂಗ್ಲೆ.

3 ಮಾಜೆ ಸಂಗಚಾ ತೀತ್ ಗ್ರೀಕ್ ಜಾಲ್ಲ್ಯಾ ತರಿ ತ್ಯಚಿ ಮುಂಜಿ ವ್ಹಯಾವ್ಹಯಿ ಮನ್ವುನ್ ಕುನಿ ಬಳ್ ಭುರಿ ಕೆಲಿ ನಾಹಿ.

4 ಫನ್ ಭುರುನ್ ಆತ್ ಆಲ್ಯಾಲ ಲಬ್ಧಬಾಹು ಆಮಾನಾ ಗುಲಾಮಾತ್ ಗಾಲ್ವಾಯಾ ವ್ಹಯಿ ಮನ್ವುನ್ ಕ್ರಿಸ್ತ ಯೇಸುಪ ಆಸ್‌ಲ್ಯಾಲಾ ಸ್ವತಂತ್ರ ಕುನಾಲಾ ಸಮಜಾಚೆ ಆಂದಿ. ಇಚಾರಾಯಾ ಆಲ್ತೆ

5 ಬರೆ ಖಬರಿಚ್ ಖರ ತುಮ್ಮಿಪ ಶಾರ್ಕ್ ರಾಹ್ಯಾ ವ್ಹಯಿ ಮನ್ವುನ್ ಆಮಿ ತ್ಯಂಚಾ ತಾಬ್ಯಾತ್ ಭರಾಬಿ ಗಾವ್ಲಾವ್ ನಾಹಿ.

6 ಫನ್ ಕೊನ್ ಫುಡಾರಿ ಮನ್ವುನ್ ಗಿಹ್ಯಾ ವ್ಹಯಿ ಮಂಥ್ಯಾತ್, ಮಿ ಸಾಂಗ್ಲೊ ಹ್ಯ ಮಾಜಿಪ ಆನಿ ತ್ಯಂಚಿಪ ಕಾಯ್ ವ್ಯತ್ಯಾಸ್ ಆನಿತ್ ನಾಹಿ; ದೇವ್ ಸಗ್‌ಳ್ಯಾನಾ ಯೇಕುಸ್ ತರನಿ ಬಗ್ಲೊ. ಮನ್ವುನ್ ತ್ಯಾ ಫುಡಾರ್ಯಾಂಚಾಪ್ಪಿ ಮನಾ ಕಾಯ್ ಗಾವ್ಲೆ ನಾಹಿ.

7 ಫನ್ ಮುಂಜಿ ಜಾಲ್ಯಾಲ್ಯಾನಾ ಬರಿ ಖಬರ್ ಸಾಂಗಾಚ್‌ಕ್ ಕಾಮ್ ಕಸ ಪೇತ್ರಾಲಾ ದಿಲ್ಯಾ ತಸಸ್ ಯೆಹುದಿ ನಸ್‌ಲ್ಯಾಲ್ಯಾ ಲೊಕಾನಾ ತ್ಯ ಸಾಂಗಾಚ್ ಕಾಮ್ ಮನಾ ದಿಲ್ತೆ.

8 ಕಾ ಮಂಜೆ ಮುಂಜಿ ಜಾಲ್ಯಾಲ್ಯಾತ್ ಅಪೊಸ್ತಲ್ ಚಾಲ್ವಾಯಾ ಸಾಟೆ ಪೇತ್ರಾಚಾ ತಾಬ್ಯಾತ್ ದಿಲ್ಯಾಲ್ಯಾ ದೇವಾನಿ, ಮುಂಜಿ ನಸ್‌ಲ್ಯಾಲ್ಯಾನಾ ತ್ಯ ಚಾಲ್ವಾಯಾ ಸಾಟೆ ಮನಾ ದಿಲೆ.

9 ಸಭೆಚ್ ಫುಡಾರಿ ಮನ್ವುನ್ ಹಾಕ್ಟುನ್ ಗೆತಲ್ಯಾಲ ಯಾಕೊಬ್ ಪೇತ್ರಾ ಯೊಹಾನ್ ದೇವಾನಿ ದಿಲ್ಯಾಲ ಮನಾ ವರ ಸಮಜುನ್ ಗಿಹುನ್ ಯಕಿ ದಾವಾಯಾ ಸಾಟೆ ಮನಾ ಬಾರ್‌ನಬಲಾ ಮಜತ್ ಕರುನ್ ಹಾತ್ ದಿವುನ್ ತುಮಿ ಯೆಹುದಿ ನಸ್‌ಲ್ಯಾಲ್ಯಾ ಲೊಕಾಪ್ಪಿ ಜ್ಞಾವಾ ಆಮಿ ಮುಂಜಿ ಕೆಲ್ಯಾಲ್ಯಾ ಲೊಕಾಪ್ಪಿ ಜ್ಞಾವಾ ಮನ್ಲೆ.

10 ಫನ್ ತುಮಿ ಗರೀಬ್ ಲೊಕಾನಾ ಇಸ್ತು ನಾಹಿಸಾ ಮನ್ವನ್ ಯೆಕುಸ್ ಗ್ಯೊಸ್ತ್ ಮಾಗತ್ಯಾತ, ತಸ ಕರ್ತ್ಯಾಲ್ಯಾತ್ ಮಿ ಮನ್ ಆಸ್ವಾರಾ ಜಾಲ್ಯೊ

ಪೌಲಾನಿ ಅಂತಿ ಯೊಕ್ಯಾತ್ ಪೇತ್ರಾಚಿ ಚುಕ್ ದಾವುನ್ ದಿಲ್ಯಾಲಿ

11 ಪೇತ್ರಾ ಅಂತಿಯೊಕ್ಯಾತ್ ಅಲ್ಲಾ ತವಾ ತ್ಯಂಚಿಪ ಚುಕ್ ದಿಸ್ಲಿ ಮನ್ವನ್ ಮೀ ತ್ಯಲಾ ತೊಂಡಾ ಸಮುರ್ ಖಡ್ಯಾವ್ಲಾ

12 ಕಾ ಮಂಜೆ ಯಾಕೊಬಾಪ್ಪಿ ಥುಡಿ ಭನ ಯಯಾಚೆ ಆಂದಿ ಪೇತ್ರಾ ಯೆಹುದಿ ನಸ್ಲ್ಯಾಲ್ಯಾಂಚೆ ಸಂಗ ಜೆವತಾ. ತೇ ಅಲ್ಯಾ ನಂತರ್ ಮುಂಜಿ ಜಾಲ್ಯಾಲ್ಯಾನಾ ತ್ಯೊ ಭೀವುನ್, ಯೆಹುದಿ ನಸ್ಲ್ಯಾಲ್ಯಾ ಲೊಕಾನಾ ಸುಡುನ್ ಆಪ್ಲು ಯುಗಾಳ್ಕಾಲಾ ದಿಸ್ತೊ.

13 ಯವ್ವಸ್ ನವ್ವರಾಯ್ಲ್ಯಾಲಿ ಯಹುದ್ಯಿ ತ್ಯಂಚಿ ಸಂಗ ಮಿಳುನ್ ಕಸ ಕಪಟ್ ಕರ್ತ್ಯಾತ. ತಸಸ್ ಬಾರ್ನಬಾ ಸಾಯಿತ್ ತ್ಯಂಚಾ ಕಪಟಾತ್ ಪಡ್ತೊ.

14 ತೇ ಬರೆ ಖಬ್ರಿಚಾ ಖರ್ಯಾ ಶಾರ್ಕ ಭಾಲತ್ ನಾಹಿತ ಮನ್ವನ್ ಮೀ ಬಗ್ಗ ತವಾ ಸಗ್ಳ್ಯಾಂಚೆ ಮೊರ್ಹ ಪೇತ್ರಾಲಾ ಸಾಂಗ್ಲ್ಯಾಲ ಕ್ಯಾ ಮಂಜೆ, ತು ಯಹುದ್ಯಿ ವ್ಹಪುನ್ ಯಹುದ್ಯಾಂಚೆಗತ್ ಚಾಲಾಚೆ ಆಂದಿ ಯೆಹುದಿ ನಸ್ಲ್ಯಾಚೆಗತ್ ಜೀವ್ನಾ ಕರುನ್, ದುಸರ್ಯಾ ಲೊಕಾನಾ, ತುಮಿ ಯಹುದ್ಯಿ ಲೊಕಾಂಚೆಗತ್ ಚಾಲಾಯಾ ವ್ಹಯಿಸಾ ಮನ್ವನ್ ಕಶಾಲಾ ಬಳ್ ಭುರಿ ಕರ್ತೊಸ್?

ಯಹುದ್ಯಾನಾ ಆನಿ ಯೆಹುದಿ ನಸ್ಲ್ಯಾಲ್ಯಾನಾ ಇಸ್ವಾಸಾನಿ ರಕ್ಷನ್

15 ಆಮಿ ತರಿ ಜಲ್ಮಾತ್ ಯಹುದ್ಯಿ ಪಾಪಿ ಮನ್ವನ್ ಗೆತಲ್ಯಾಲ್ಯಾ ಯೆಹುದಿ ನಸ್ಲ್ಯಾಲ್ಯಾನಾ ನವ್ವ

16 ಕುನಿ ತರಿ ಯೇಸು ಕ್ರಿಸ್ತಾವ ಇಸ್ವಾಸ್ ತೆವ್ಲ್ಯಾಲ್ಯಾಸ್ ಲಾಗುನ್ ಧರ್ಮಶಾಸ್ತ್ರಾರಾಚೆ ನೆಮ್ ಪ್ಯಾಳ್ತಾತ ಮನ್ವನ್ ನೀಯತಿಚಾ ಮನ್ವನ್ ಧರತ್ನಾಹಿ ಮನ್ವನ್ ಆಮಾನಾ ಸಮಾಜಲ್ಯಾ ಮನ್ವನ್ ಆಮಿ ಸಾಯಿತ್

ಧರ್ಮಶಾಸ್ತ್ರಾರಾಚೆ ನೆಮ್ ಸುಡುನ್ ಕ್ರಿಸ್ತ ಯೇಸುವ ಇಸ್ವಾಸ್ ಥೆವ್ತಾವ್. ಕಾ ಮಂಜೆ ಕೊನ್ ಧರ್ಮಶಾಸ್ತ್ರಾರಾಚಾ ನೆಮಾ ಶಾರ್ಕ ಚಾಲತ್ಯಾಲಾ ನೀಯತಿಚಾ ಮನ್ವುನ್ ಥರತ್ ನಾಹಿತ.

17 ಫನ್ ಆಮಿ ಕ್ರಿಸ್ತಾಸ್ ಲಾಗುನ್ ನೀಯತಿಚೆ ಮನ್ವುನ್ ನಿರ್ಧಾರ್ ಗಿಹ್ಯಾ ಯತ್ನ ಕರ್ತಾನಾ, ಆಮಿ ಪಾಪಿ ಮನ್ವುನ್ ದಿಸುನ್ ಆಲ್ಯಾವ ಕ್ರಿಸ್ತ ಪಾಪಾಲಾ ಮಜತ್ ಕರ್ನಾರಾ ಕ್ಯಾ? ಕಂದಿಸ್ತಾಹಿ.

18 ಮೀ ಪ್ಯಾಡ್‌ಲ್ಯಾಲ ಪರ್ತುನ್ ಬ್ಯಾಂದ್‌ಲ್ಯಾವ ಮನಾಸ್ ಮೀಸ್ ಗುನ್ವದಾರ್ ಮನ್ವುನ್ ದಿಸ್ತೊನವ್ಚ.

19 ಮೀ ತರಿ ದೇವಾ ಸಾಟಿ ಜೀವ್ನಾ ಕರಾಯಾ ಸಾಟಿ ಧರ್ಮಶಾಸ್ತ್ರಾರಾಸ್ ಲಾಗುನ್ ಧರ್ಮಶಾಸ್ತ್ರಾರಾ ಸಾಟಿ ಮೆಲ್ಯೊ ಮೀ ಸಾಯಿತ್ ಕ್ರಿಸ್ತಾ ಸಂಗ ಶಿಲ್ವೆವ ಹಾ,

20 ಮನ್ವುನ್ ಹೀತ್ಲಿ ಮೊರ್ಹ ಜೀವ್ನಾ ಕರ್ನಾರಾ ಮಿನವ್ಚ ಫನ್ ಕ್ರಿಸ್ತ ಮಾಜಿಪ ಜೀವ್ನಾ ಕರ್ನಾರ್. ಆತಾ ಶರೀರಾನಿ ಆಸ್‌ಲ್ಯಾಲಾ ಮೀ ಜೀವ್ನಾ ಕರಾಚೊ ಕಸಾ ಮಂಜೆ ದೇವಾಚಾ ಲೇಕಾವಲ್ಯಾ ಇಸ್ವಾಸಾನಿಸ್. ತ್ಯನಿ ಮಾಜಿ ಮಾಯಾ ಕರುನ್ ಮಾಜಿ ಸಾಟಿ ಆಪ್‌ಲ್ಯಾಲಾಸ್ ದಿಲಾ.

21 ಮೀ ದೇವಾಚೆ ಕ್ರಪೆಚಿ ನಕ್ವಾಟ್ ಕರಿತ್ವಾಹಿ. ಧರ್ಮಶಾಸ್ತ್ರಾರಾಸ್ ಲಾಗುನ್ ನೀಯತಿಚೆ ವ್ಹಯಾಚೆ ಚಾಲ್ಯಾವ ಕ್ರಿಸ್ತ ಮೆಲ್ಯಾಲಾ ಪುಕಟ್.

3

ಧರ್ಮಶಾಸ್ತ್ರಾರ್ ಕ್ಯಾ ಇಸ್ವಾಸ್

1 ಆರ ಬುದ್ಧಿ ನಸ್‌ಲ್ಯಾಲ್ಯಾ ಗಲಾತಿ ಕರಾನು! ತುಮಾನಾ ಕುನಿ ಪುಲಿವ್ಲಿತ? ಯೇಸು ಕ್ರಿಸ್ತಾನಿ ಶಿಲ್ವೆವ ಗಾಲ್ವುನ್ ಗಿಹುನ್ ತುಮ್ಮಾ ಡೊಳ್ಕಾಂಚೆ ಮೊರ್ಹ ವರ್ನನ್ ಕೆಲಾ ನವ್ಚ?

2 ಏಕುಸ್ ಗ್ಯೊಸ್ವ ತುಮ್ಮಿಪ್ಪಿ ಸಮಜುನ್ ಗಿಹ್ಯಾವ್ಚಯಿ. ತುಮಿ ದೇವಾಚೆ ಆತ್ಮ ಗೆತಲ್ಯಾಲ ಧರ್ಮಶಾಸ್ತ್ರಾರಾಚೆ ನೆಮ್ ಪ್ಯಾಳ್‌ತ್ಯಾಲ್ಯಾನಿ ಕ್ಯಾ ತುಮಿ ಐಕ್‌ಲ್ಯಾಲ್ಯಾ ಬರಿ ಖಬರಿಚಾ ಇಸ್ವಾಸಾನಿ?

3 ತುಮಿ ಇತ್ಥಿ ಖುಳಿ ಕ್ಯಾ? ದೇವಾಚಾ ಆತ್ಮಾನಿ ಸುರ್ವಾತ್ ಕರುನ್ ಆತಾ ತುಮ್ಮಾ ಬಳಾನಿ ಸರ್ತ ಕರ್ನಾರ್ ಕ್ಯಾ?

4 ತುಮಿ ಹಿ ಸಗ್ಳಿ ದುಖ ಸುಸಿವ್‌ಲ್ಯಾಲಿ ಉಗಸ್ ಕ್ಯಾ? ಉಗಸುಸ್ ಮನ್ಶಾಯಾ ವ್ಹಯಿ ಕ್ಯಾ?

5 ದೇವಾನಿ ಆಪ್ಲ ಆತ್ಮ ತುಮಾನಾ ಖುಬ್ ದಿವುನ್ ತುಮ್‌ಚಿಪ ಮೊಟಿ ಮೊಟಿ ಕಾಮ ಕರಿತ್ ಆಲ್ಯಾಲಾ, ತುಮಿ ಧರ್ಮಶಾಸ್ತ್ರಾರಾ ಸಾರ ಚಾಲಾಸಾ ಮನ್ಶುನ್ ಕ್ಯಾ ಬರಿ ಖಬರ್ ಐಕುನ್ ಇಸ್ವಾಸ್ ತೆವ್ಲಾಸಾ ಮನ್ಶುನ್?

6 ಅಬ್ರಹಾಮಾನಿ ದೇವಾವ ಇಸ್ವಾಸ್ ಥೆವ್ಲಾ, ತ್ಯೊ ಇಸ್ವಾಸ್ ತ್ಯಲಾ ನೀಯತಿಚಾ ಮನ್ಶುನ್ ಥರ್ತೊ ಮನ್ಶುನ್ ಪವಿತ್ರ ಗ್ರಂಥಾತ್ ಲೀವ್‌ಲ್ಯಾನವ್ಚ್.

7 ಮನ್ಶುನ್ ಇಸ್ವಾಸ್ ಕರ್ನಾರಿ ಅಬ್ರಹಾಮಾಚಿ ಪೊರ ಮನ್ಶುನ್ ಸಮಜುನ್ ಗೆವಾ.

8 ದೇವಾನಿ ದುಸ್ಮರ್ಮ್ಯಾ ಲೊಕಾನಾ ಇಸ್ವಾಸಾಸ್ ಲಾಗುನ್ ನೀಯತಿಚಿ ಮನ್ಶುನ್ ತಿರ್ಮಾನ್ ಕೆಲ್ಯಾ ತಸಸ್ ಪವಿತ್ರ ಗ್ರಂಥಾತ್ ಅಬ್ರಹಾಮಾಲಾ, ತುಜಿಸ್ ಲಾಗುನ್ ಸಗ್ಳ್ಯಾ ಲೊಕಾನಾ ಆಶೀರ್ವಾದ್ ಗಾವ್ನಾರ್ ಮನ್ಶಾಚಿ ಬರಿ ಖಬರ್ ಆಂದಿಸ್ ಸಾಂಗ್ಲೆ.

9 ಆಸ ಆಸ್ತಾನಾ ಕೊನ್ ಇಸ್ವಾಸ್ ಥೆವ್ಲೊ, ತ್ಯೊ ಇಸ್ವಾಸ್ ಥೆವ್‌ಲ್ಯಾಲ್ಯಾ ಅಬ್ರಹಾಮಾ ಸಂಗ ಆಶೀರ್ವಾದ್ ಗೆನಾರ್.

10 ಮೊಶೆಚಾ ಧರ್ಮಶಾಸ್ತ್ರಾರಾಚ್ ನೆಮ್ ಆಧಾರ್ ಕೆಲ್ಯಾಲಿ ಸಗ್ಳಿ ಸರಾಪ್ ಲಾಗಲ್ಯಾಲಿ ಜಾಲ್ಯಾತ್. ಕಸ ಮಂಜೆ, “ಧರ್ಮಶಾಸ್ತ್ರಾರಾತ್ ಲಿವ್‌ಲ್ಯಾಲ ಸಗ್ಳಿ ಖಾಯಿಮ್ ಪಾಳಿತ್ ನಸ್ಸಾರಾ ಪರ್ತೆಕ್ ಯೊಕ್ ಸರಾಪ್ ಲಾಗಲ್ಯಾಲಾ ” ಮನ್ಶುನ್ ಧರ್ಮಶಾಸ್ತ್ರಾರಾತ್ ಲಿವ್‌ಲ್ಯಾ.

11 ಯವ್ಹಸ್ವಪ್ಪ ಧರ್ಮಶಾಸ್ತ್ರಾರಾನಿ ಕೊನುಸ್ ದೇವಾಪ ನೀಯತಿಚ್ ವ್ಹಯಾ ವ್ಹಯಿತ್ಪಾಹಿ ಮನ್ಶುನ್ ರಾವಹಾ, ಕಾ ಮಂಜೆ ನೀಯತಿಚಾ ಇಸ್ವಾಸಾನಿಸ್ ಭಗಲ್ ಮನ್ಶುನ್ ಸಾಂಗ್‌ಲ್ಯಾ.

12 ತಸಸ್ ಮೊಶೆಚಾ ಧರ್ಮಶಾಸ್ತ್ರಾಲಾ ಇಸ್ವಾಸಾವ ಆಧಾರ್ ಜಾಲ್ಲ್ಯಾ ನಾಹಿ, “ಕೊನ್ ಧರ್ಮಶಾಸ್ತ್ರಾಚ್ ನೆಮ್ ಫ್ಯಾಳ್ತೊ ತ್ಯೊತ್ಯನಿಸ್ ಜಗ್ನಾರ್” ಮನ್ವನ್ ಲಿವ್ಲ್ಯಾ.

13 ಯೇಸು ಕ್ರಿಸ್ತ ಆಮಾನಾ ಸರ್ಪಾತ್ಲಿ ಸೊಡ್ವಾಯಾ ಸಾಟಿ ಆಪ್ನುಸ್ ಸರಾಪ್ ಲಾಗಲ್ಯಾಲಾ ಜಾಲಾ. “ಕಾ ಮಂಜೆ ಮೊಶೆಚಾ ಧರ್ಮಶಾಸ್ತ್ರಾತ್ ಲಿವ್ಲ್ಯಾ ಶಾರ್ಕ್ ಭಾಡಾವ ಟ್ಯಾಂಗ್ಲ್ಯಾಲಾ ಪರ್ತೆಕ್ ಸರಾಪ್ ಲಾಗಲ್ಯಾಲಾ ಮನ್ವನ್ ಸಮಜುನ್ ಗೆತಲ್ಯಾ.

14 ಅಬ್ರಹಾಮಾಲಾ ದಿಲ್ಯಾಲಾ ಆಶಿರ್ವಾದ್, ಕ್ರಿಸ್ತ ಯೇಸುಪ ಯೆಹುದಿ ನಸ್ಲ್ಯಾಲ್ಯಾ ಲೊಕಾನಾ ಸಗ್ಳ್ಯಾ ಗಾವಸಾರ ಆನಿ ದೇವಾನಿ ಸಬ್ದದಿಲ್ಯಾಸಾರ ಪರಿಶುದ್ಧ ಆತ್ಮ ಆಮಾನಾ ಇಸ್ವಾಸಾಸ್ ಲಾಗುನ್ ಗಾವಸಾರ, ಆಪ್ಲ್ಯಾ ಮರ್ನಾಸ್ ಲಾಗುನ್ ಕ್ರಿಸ್ತಾನಿ ಆಮಾನಾ ಗಿತ್ಲಿತ.

ಧರ್ಮಶಾಸ್ತ್ರಾರ್ ಆನಿ ಸಬ್ದ

15 ಬನ್ದಿ ಬಾವ್ತಾನ್, ಖಾಯಿಮ್ಚಾ ಜೀವ್ನಾನಿ ಯೆಕ್ ಉದಾಹರನ್ ತುಮಾನಾ ಸಾಂಗ್ತೊ, ಯಕಾನಿ ಆನಿ ಯಕಾ ಸಂಗ ಕೆಲ್ಯಾಲಾ ಕರಾರ್ ನಿಸ್ತಾ ಮಾನ್ವಾಚಾ ಭಾಲ್ಯಾವ, ತ್ಯೊಕುನಿ ಮುಡುನಾಹಿ ಆನಿ ತ್ಯೆಲಾ ಕಾಯ್ ಯೇಕ್ ಜೊಡ್ವಾಚ್ ನಾಹಿ.

16 ತಸಸ್, ದೇವಾನಿ ಅಬ್ರಹಾಮಾಲಾ ಆನಿ ತ್ಯಂಚೆ ಪೀಳ್ಗಿಲಾ ಸಬ್ದ ದಿಲ್ಯಾ ಪನ್ ಪೀಳ್ಗಿ ಮನ್ವನ್ ಸಾಂಗ್ಲ್ಯಾವ, ತೇ ಪೀಳ್ಗಿತ್ ಆಸ್ಲ್ಯಾಲ್ಯಾ ಸಗ್ಳ್ಯಾನಾ ನವ್ವ ಅಬ್ರಹಾಮಾಚೆ ಪೀಳ್ಗಿತ್ಲ್ಯಾ ಯಕಾ ಮಾನ್ವಾಲಾ ದ್ಯಾವ್ತ. ತ್ಯೊಯೊಕುಸ್ ಕ್ರಿಸ್ತ್.

17 ಮೀ ಸಾಂಗಾಚ್ ಕ್ಯಾ ಮಂಜೆ, ದೇವಾನಿ ಆಂದಿ ಕೆಲ್ಯಾಲಾ ಕರಾರ್, ಚಾರ್ಸೆ ತೀಸ್ ವರ್ಸಾಚೆ ನಂತರ್ ಆಲ್ಯಾಲ ಮೊಶೆಚ ಧರ್ಮಶಾಸ್ತ್ರಾಲಾ ತ್ಯಾ ಸಬ್ದಾಲಾ ಮೊಡಾಯಾ ವ್ಹಯಿತ್ಲಾಹಿ.

18 ಕಾ ಮಂಜೆ ಯಕ ಯಳಿ ದೇವಾಚ್ ದೆನ ಧರ್ಮಶಾಸ್ತ್ರಾವ ಆದಾರ್ ಜಾಲತ, ತ್ಯೆತ್ಯಚಾ ಸಬ್ದಾವ ಆಧಾರ್ ವ್ಹಪುನ್ ನಾಹಿ ಮನ್ವನ್

ಜಾಲ್ಮ ಫನ್ ದೇವಾನಿ ಅಬ್ರಹಾಮಾಲಾ ಆಪಲ್ಯಾ ಸಬ್ದಾಸ್ ಲಾಗುನ್ ತೀ ದಿನ್ನಿ ದಿಲ್ಲಿ.

19 ತಸ ಜಾಲ್ಯಾ ಮೊಶೆಚ್ ಧರ್ಮಶಾಸ್ತಾರ್ ಕಾ? ಸಬ್ದಾನಿ ದಾವುನ್ ದಿಲ್ಯಾಲಾ ಜಲ್ಮುನ್ ಯಯಿ ಪರತ್ ದೇವಾನಿ ಆಮ್ಕಿ ಆಮ್ಕಿ ಫುಕ್ ಮನ್ವುನ್ ದಾವಾಯಾ ಸಾಟಿ ತ್ಯೊ ಸಬ್ದಾಚೆ ನಂತರ್ ನಿವ್ವುನ್ ದೇವ್ಪತಾಚಾ ತೊಂಡಾನಿ ಯಕಾ ದೆಡ್ಯಾಚಾ ಹಾತಾತ್ ದಿಲ.

20 ಯಕ್ಲಾ ಆಸ್ತಾನಾ ಮದ್ದಿ ಕೊನ್ ನಕೊ. ದೇವ್ ಯಕ್ಲಾಸ್.

ಧರ್ಮಶಾಸ್ತ್ರಾರಾಚ್ ಉದ್ದೆಶ್

21 ತಸ ಜಾಲ್ಯಾವ ಮೊಶೆಚ್ ಧರ್ಮಶಾಸ್ತಾರ್ ದೇವಾಚಾ ಸಬ್ದಾನಾ ಆಡ್ಲ ಕ್ಯಾ? ತಸ ಕಂದಿಸ್ ಸಮಜುನ್ ಗಿಹುನಾಹಿ. ಜಗಿವ್ವಾರ್ ಧರ್ಮಶಾಸ್ತಾರ್ ದಿಲ್ಯಾವ ತ್ಯಚಿಗತ್ ಚಾಲ್ಯಾವ ಅನ್ಮಾನ್ ನಸ್ತಾನಾ ನೀಯತ್ ಆಲಿಆಸ್ತಿ.

22 ಸಗ್ಳಿ ದುನ್ಯಾ ಪಾಪಾಚಾ ತಾಬ್ಯಾತ್ ಹಾ ಮನ್ವುನ್ ಪವಿತ್ರ ಪುತೀಕ್ ದ್ಯಾವ್ತ. ಆಸ ಆಸ್ತಾನಾ ವಾಗ್ದಾನ್ ಕೆಲ್ಯಾಲ ಫಳ್ ಯೇಸು ಕ್ರಿಸ್ತಾವ ಇಸ್ವಾಸ್ ಥೆವ್ವಾರ್ಯಾನಾ ತ್ಯಚಾ ಇಸ್ವಾಸಾಚಾ ಆಧಾರಾವ ದೇತ್ಯಾತ್.

23 ಪನ್ ಯೇಸು ಕ್ರಿಸ್ತಾಚಾ ಇಸ್ವಾಸಾತ್ ಜೀವ್ನಾ ಕರಾಚ್ ದಿಸ್ ಯಯಾಚೆ ಆಂದಿ ಆಮಿ ಮೊರ್ಹ ದಿಸ್ವಾರ್ಯಾ ತ್ಯಾ ಇಸ್ವಾಸಾತ್ ಗಾವಾಯಾ ಸಾಟಿ ಮೊಶೆಚಾ ಧರ್ಮಶಾಸ್ತ್ರಾರಾಚಾ ಬಾದ್ವಾತ್ ಗಾವಲ್ಯಾವ್.

24 ಆಮಿ ಇಸ್ವಾಸಾನಿ ಯೇಸು ಕ್ರಿಸ್ತಾಪ ನೀಯತಿಚ್ ಮನ್ವುನ್ ನಿರ್ಧಾರ್ ಗೆನಾರ ದಿಸ್ ಯಯಿ ಪರತ್, ಮೊಶೆಚ್ ಧರ್ಮಶಾಸ್ತಾರ್ ಆಮಾನಾ ಮೊರ್ಹ ನೆನಾರ್ಯಾ ಫುಡಾರ್ಯಾಚಿಗತ್ ಹಾ.

25 ಫನ್ ಆತಾ ಇಸ್ವಾಸ್ ಆಲ್ಯಾ ಮನ್ವುನ್ ಆಮಿ ಫುಡಾರಿ ಜಾಲ್ಯಾಲ್ಯಾ ಧರ್ಮಶಾಸ್ತ್ರಾರಾಚಾ ತಾಬ್ಯಾತ್ನಾಹಿ

26 ಕಾ ಮಂಜೆ ತುಮಿ ಸಗ್ಳಿ ಕ್ರಿಸ್ತ ಯೇಸುವ ಥೆವ್ಲ್ಯಾಲ್ಯಾ ಇಸ್ವಾಸ್ ಲಾಗುನ್ ದೇವಾಚಿ ಪೊರ ಜಾಲ್ಯಾಸಾ.

27 ಕಸ ಮಂಜೆ ಕ್ರಿಸ್ತಾಪ ಮಿಳಾಯಾ ಬಾಪ್ತಿಸ್ಮಾ ಗೆತಲ್ಯಾಲಿ ತುಮಿ ಸಗ್ಗಿ ಕ್ರಿಸ್ತಾಚೆಗತ್ ಹುತ್ತಾಸಾ.

28 ತುಮಿ ಸಗ್ಗಿ ಕ್ರಿಸ್ತ ಯೇಸುಪ ಎಕುಸ್ ಹಾಸಾ ಮನ್ವುನ್ ಯೆಹುದ್ಯಾ ನಾಹಿತ ಗ್ರೀಕ್ ವ್ಹಪುನಿ, ಗುಲಾಮ್ ನಾಹಿತ ಸ್ವತಂತ್ರ, ಧನ್ವಿ ಆನಿ ಆಳ್ ಗಡಿ ಆನಿ ಬ್ಯಾಯ್ಕಾ ಮಾನುಸ್ ಆಸಾ ಭೇದ್ ಭಾವ್ವಾಹಿ.

29 ತುಮಿ ಕ್ರಿಸ್ತಾಚಿ ಜಾಲ್ಯಾವ ಅಬ್ರಹಾಮಾಚೆ ಪೀಳ್ಗಿಚಿ ವ್ಹಪುನ್ ತಸಸ್ ದೇವಾಚಾ ವಾಗ್ದಾನಾಲಾ ಹಾಕ್ವಾರ್ ಜಾಲ್ಯಾಸಾ.

4

1 ಫನ್ ಮೀ ಸಾಂಗಾಚಿ ಕ್ಯಾ ಮಂಜೆ, ವಾರ್ಸಿ, ಆಪ್ಲು ಸಗ್ಗಿ ಆಸ್ತೀಲಾ ದನ್ವಿ ಆಸ್ತಾತರಿ ಬಾರಿಕ್ ಆಸ್ತಾನಾ ಗುಲಾಮಾಚೆಗತುಸ್ ರಾನ್ವಾರ್.

2 ಬಾನಿ ಥರಿವ್‌ಲ್ಯಾಲ್ಯಾ ಯಳಾಪರತ್ ಬಾಚಾ ಆನಿ ಕಾಮ್‌ದಾರಾಚಾ ತಾಬ್ಯಾತ್ ಆಸ್ತೊ.

3 ತಸಿಸ್ ಆಮಿ ಸಾಯಿತ್ ಮುಲ್ ಆಸ್ತಾನಾ ದುನೆಚಾ ಪೈಲ್ಯಾ ಶಿಕ್ಷಾನಾಚಾ ತಾಬ್ಯಾತ್ ರಾಥಾವ್.

4 ಪನ್ ಶಾರ್ಕಾ ಯೊಳ್ ಆಲಾತವಾ ದೇವಾನಿ ಆಪ್‌ಲ್ಯಾ ಲೆಕಾಲಾ ಲಾವುನ್ವಿಲಾ. ತ್ಯೊ ಬ್ಯಾಯ್ಕಾ ಮಾನ್ಸಾಚಾಪೊಟಾತ್ ಜಿಲ್ಮುನ್ , ಧರ್ಮಶಾಸ್ತ್ರಾಚೆಗತ್ ಆಲ್ಲಾ.

5 ಹ್ಯಚಿಸ್ ಲಾಗುನ್ ಧರ್ಮಶಾಸ್ತ್ರಾರಾಚಾ ತಾಬ್ಯಾತ್ ಆಸ್‌ಲ್ಯಾಲ್ಯಾನಾ ಸುಟ್ವುಕ್ ದಿಯಾ ಅಲ್ಯಾ ಮನ್ವುನ್ ಆಮಿ ದೇವಾಚಿ ಪೊರ ಜಾಲ್ಯಾವ್

6 ತುಮಿ ಲೆಕ್ರ ಜಾಲ್ಯಾಸಾ ಮನ್ವುನ್ ದೇವಾಲಾ ಬಾ ಮಾಜಾ ಬಾ, ಮನ್ವುನ್ ವರಾಡ್‌ತ್ಯಾಲ್ಯಾ ಆಪ್‌ಲ್ಯಾ ಲೆಕಾಚಿ ಆತ್ಮ ಆಮ್ಚಾ ಶರೀರಾತ್ ಲಾವುನ್ವಿಲ.

7 ಆಸ ಆಸ್ತಾನಾ ಆಜ್ಞುನ್ ತು ಸೇವಕ್ ನವ, ಲ್ಯೊಕ್. ಲ್ಯೊಕ್ ಜಾಲ್ಯಾವ ದೇವಾಪ್ಪಿ ವಾರ್ಸಿ ಜಾಲ್ಯಾಸ್.

ಗಲಾತ್ಯಾತಲ್ಯಾಂಚೆ ಗುಸ್ವಿತ್ ಪೌಲಾಚಿ ಕ್ಯಾಳ್ಜೆ

8 ಆಸಿ ತುಮಿ ದೇವಾಲಾ ಸಮಜುನ್ ಗಿಹ್ಯಾಚೆ ಆಂದಿ, ಸಜ್ಜೆ ದೇವ್ ನವ್ವತ್ಯನಾ ಗುಲಾಮ್ ಜಾಲ್ತಾಸಾ.

9 ಆತಾ ತರಿ ತುಮಿ ದೇವಾಲಾ ಸಮಜುನ್ ಗೆತಲ್ಯಾಸಾ. ಖುಬ್ ಕರುನ್ ದೇವಾನಿ ತುಮಾನಾ ಸಮಜುನ್ ಗೆತಲ್ಯಾ ಆಸ ಆಸ್ತಾನಾ ತುಮಿ ಬಳ್ ನಸ್‌ಲ್ಯಾಲ್ಯಾ ಕಾಮಾಲಾ ಯಯಿ ನಸ್‌ಲ್ಯಾಲ, ಆಮ್ಚೆ ಉಪೇಗಿಚ್ ನಸ್‌ಲ್ಯಾಲ್ಯಾತ್ ಮಾಗಾರಿ ಪರ್ತುನ್ ತ್ಯಲಾ ಗುಲಾಮ್ ವ್ಹಯಾ ಕಾ ಮನ್ ಕರ್ತಾಸಾ?

10 ತುಮಿ ಶಾರ್ಕ್ ದಿಸ್, ಮೈನ್ಡ್ ಕಾಲ್, ಸಗ್ಳಿ ವರ್ಸ ಶಾರ್ಕ್ ಪ್ಯಾಳ್ತಿಸಾ.

11 ಮೀ ತುಮ್ಚಿ ಸಾಟಿ ಖಿಟ್ಟಟ್ ಕೆಲ್ಯಾಲಿ ಪುಕಟ್ ಭಾಲಿ ಕ್ಯಾ ಮನ್ವುನ್ ತುಮ್ಚಿ ಗುಸ್ತಿತ್ ಬಿಥೊ.

12 ಬನ್ನಿ ಬಾವ್ತಾನು, ಮೀ ತುಮ್ಚಿಗತ್ ಭಾಲೊ ತಸಾ ತುಮಿ ಮಾಜಿಗತ್ ವ್ಹಯಾವ್ಹಯಿಸಾ ಮನ್ವುನ್ ತುಮ್ಚಿಪ ಮಾಕ್ತೊ. ತುಮಿ ಮನಾ ಕಾಯ್ ಅನೇವ್ ಕೆಲಾನಾಹಿಸಾ.

13 ಮಾಜಾ ಆಂಗಾತ್ ದುಕ್ಕ ಹಾ ಮನ್ವುನ್ ತುಮ್ಚಿಪ ರಾವುನ್ ಪೈಲೆ ಪಾವ್ಲಿ ತುಮಾನಾ ಬರಿ ಖಬರ್ ಸಾಂಗ್‌ಲ್ಯಾಲಿ ತುಮಾನಾ ಠಾವಿ ಹಾ.

14 ಮಾಜಾ ಆಂಗಾಚಾ ದುಕ್‌ನ್ಯಾನಿ ತುಮಾನಾ ತರಾಸ್ ಜಾಲಾತರಿ, ತುಮಿ ಮನಾ ಟ್ಯಾಕ್ಲಾನಾಹಿಸಾ, ನಕ್ವಾಟ್ ಕಿಲಿನಾಹಿಸಾ. ಮನಾ ದೇವ್ ದುತಾಚಿಗತ್, ಕ್ರಿಸ್ತ ಯೇಸುಪ ಗೆತ್ಲಾಸಾ.

15 ತವಾ ಆಮಾನಾ ಬರಜಾಲ ಮನ್ವುನ್ ತುಮಿ ಮಂಥಾಸಾನವ್ವ ತ್ಯ ತುಮಚ್ ಬರಫನ್ ಕುಂಡಗೇಲ? ಸಾದ್ಯಾ ಜಾಲ್ಯಾವ ತುಮಚ್ ಡೊಳ ಕಾಡುನ್ ಮನಾ ದಿಸಿಲಾ ಮನ್ವುನ್ ತುಮ್ಚಿ ಗುಸ್ತಿತ್ ಸಾಕ್ಷಿ ಸಾಂಗ್ತೊ.

16 ಆಸ ಆಸ್ತಾನಾ ಮೀ ತುಮಾನಾ ಖರ ಸಾಂಗ್ತೊ ಮನ್ವುನ್ ತುಮಾನಾ ಆತಾ ವಾದಿ ಜಾಲೊ ಕ್ಯಾ?

17 ತೀ ತುಮಾನಾ ವವ್ಯಾಳಾಲಾ ಮನ್ ದ್ಯಾವತ್ಯಾತ ಫನ್ ಬರಲ್ಯಾಲಾ ನವ್ವ ತುಮಿ ತ್ಯಂಚಿ ಸಾಟಿ ಮನ್ ದ್ಯಾವ್ತಾಸಾ ತಸಿಸ್ ತುಮಾನಾಬಿ ತ್ಯಂಚಾನಿ ಮನ್ ದಾವಾಯಾ ವ್ಹಯಿ ಮನ್ವುನ್ ತೀ ತುಮಾನಾ ಬಾಹಿರ್ ಗಾಲಾಯಾ ಬಕ್‌ತ್ಯಾತ.

18 ಮೀ ತುಮ್ಮಿ ಸಂಗ ಆಸ್ತಾನಾ ತ್ಯವ್ವನ್ನವ್ವ ಕವಾಬಿ ಬರೆ ಗುಸ್ತಿಸಾಟಿ ತುಮಿ ಮನ್ ದಾವಾಚ್ ಬರಸ್.

19 ಮಾಜೆ ಮಾಯಾಚಾ ಗಲಾತ್ಯಾತಲ್ಯಾ ಮುಲಾನು, ಕ್ರಿಸ್ತಾಚಾ ರುಪ್ ತುಮ್ಮಿಪ ಉತ್ಪನ್ ವ್ಹಯಿ ಪರತ್ ಮೀ ತುಮ್ಮಿ ಸಾಟಿ ಬಾಳ್ತಿನಿಚ್‌ಯಾಗ್ ಕ್ಯಾಡ್ಲೊ.

20 ತುಮ್ಮೆ ಗುಸ್ತಿತ್ ಕ್ಯಾ ಕರಾಯಾವ್ಹಯಿ ಮನ್ವುನ್ ಮನಾ ಸಮಜನಾ. ಮನಾವಾಟಿ ನಿಟ್ ತುಮ್ಮಿಪ ಯವುನ್, ತುಮ್ಮೆ ಮದ್ದಿಸ್ ರಾವುನ್ ಮಾಜೆ ಬುಲಿಚಿ ಥಿರಿ ಬದಲ್ಯಾವ ಚಾಂಗ್ಲ ವ್ಹಯಾಚ್ ವ್ಹತ!

ಸಾರಾಚಿ ಆನಿ ಹಾಗರಾಚಿ ಉದಾಹರನ್

21 ಧರ್ಮಶಾಸ್ತ್ರಾರಾಚೆಗತ್ ಚಾಲಾಯಾ ಮನ್ ಕರ್ತ್ಯಾಲ್ಯಾನು, ಧರ್ಮಶಾಸ್ತ್ರಾರ್ ಕ್ಯಾ ಸಾಂಗ್‌ತ್ಯಾ ಮನ್ವುನ್ ತುಮಾನಾ ಸಮಾಜ್‌ನಾಹಿ ಕ್ಯಾ? ಮನಾ ಸಾಂಗಾ.

22 ತ್ಯಾತ್ ಲಿವ್‌ಲ್ಯಾಲ ಕ್ಯಾ ಮಂಜೆ, ಅಬ್ರಹಾಮಾಲಾ ದೊಗ ಲ್ಯಾಕ್ ಹುತ್ತ. ಯೊಕ್ ಚಾಕ್ರಿನಿಚಾ ಪೊಟಾತ್ ಜಲಾಮ್‌ಲ್ಯಾಲಾ, ಆನಿ ಯೊಕ್ ಸ್ವತಾಚೆ ಬಾಯ್ಕೊಚಾ ಪೊಟಾತ್ ಜಲಾಮ್‌ಲ್ಯಾಲಾ.

23 ಚಾಕ್ರಿನಿಚಾ ಲ್ಯೊಕ್ ಸಜ್ಜ್ ಜಲಾಮ್‌ಲ್ಯಾಲಾ, ಸ್ವತಂತ್ರ ಆಸ್‌ಲ್ಯಾಲಿಚಾ ಲ್ಯೊಕ್ ವಾಗ್ದಾನಾ ನಿ ಜಲಾಮ್‌ಲ್ಯಾಲಾ.

24 ಹ್ಯಾ ಗುಸ್ತಿ ಯಕಾಚೆಗತುಸ್ ಹಾತಾ. ಕಶಾ ಮಂಜೆ ತ್ಯಾ ದುಗಿ ಬ್ಯಾಯ್ಕಾಮಾನ್ಸ್ ದೊನ್ ಕರಾರ್, ಯೊಕ್ ಕರಾರ್ ಸೀನಾಯಿ ಪರ್ವತಾತ್ನಿ ಗುಲಾಮಾತ್ ರಾಯಾವ್ಹಯಿತ್ಯಾ ಪೊರಾನಾ ಜಲ್ಮದೆನಾರ್, ತೀಸ್ ಹಾಗರಳ್.

25 ಹಾಗರಳ್ ಮಂಜೆ ಅರಬಾಚಾ ಜಾಗ್ಯಾವ್ಲಾ ಸೀಪಾಯಿ ಪರ್ವತ ಮನ್ವುನ್ ದ್ಯಾವತ್ಯಾಲ ಆತಾಚಾ ಯೆರುಸಲೇಮ್ ಮಂತ್ಯಾಚೆಗತ್ ಹಾ, ಕಾ ಮಂಜೆ ತೀ ಆಪ್‌ಲ್ಯಾ ಪೊರಾ ಸಂಗ್ನಿ ಹ್ಯಾ ಗುಲಾಮಾತ್ ಹಾ.

26 ಫನ್ ವೈಲಿ ಯೆರುಸಲೇಮ್ ಮಂತ್ಯಾಲಿ ಸ್ವತಂತ್ರಿ, ಹಿಸ್ ಆಮಾನಾ ಆಯಿ.

27 ಕಾ ಮಂಜೆ, “ವಾಂಘೊಳೆ, ಸಂತೊಸ್ ಹೊ.

ಬಾಳತ್ ಪನಾಚ್ ಯಾಗ್ ನಸ್ಸಾರೆ, ಸಂತೊಶಾನಿ ವರಾಡ್,
ದನ್ನೊರ್ ಆಸ್‌ಲ್ಯಾಲಿವ್ನಿ ದನ್ನೊರ್ ಶೊಡ್‌ಲ್ಯಾಲಿಲಾ ಪೊರ ಖುಬ್”
ಮನ್ವನ್ ಲಿವ್‌ಲ್ಯಾಲ ಹಾ ನವ್ವ.

28 ಬನ್ನಿ ಬಾವ್ವಾನು, ಆಮಿ ಇಸಾಕಾಚೆಗತ್ ಸಬ್ದಾಚೆಗತ್
ಜಲಾಮ್‌ಲ್ಯಾಲಿ ಪೊರಜಾಲ್ಯಾವ್.

29 ಫನ್ ಆಂದಿ ಶರೀರಾನಿ ಜಲಾಮ್‌ಲ್ಯಾಲಾ, ದೇವಾಚಾ
ಆತ್‌ಮ್ಯಾಚಾ ಬಳಾನಿ ಜಲಾಮ್‌ಲ್ಯಾಲಾ ತರಾಸ್ ದಿಲ್ಯಾಸಾರಾ
ಆತಾಬಿ ವ್ಹತ್ಯಾ.

30 ಫನ್ ಪವಿತ್ರ ಗ್ರಂಥ ಕ್ಯಾಸಾಂಗ್‌ತ್ಯಾ? ಚಾಕ್ರಿನಿಲಾ ತಿಚಾ ಪೊರಾನಾ
ಬಾಹಿರ್ ಗ್ಯಾಲ್. ಚಾಕ್ರಿನಿಚಾ ಲ್ಯೊಕ್ ಸ್ವತಂತ್ರಿಚಾ ಲೆಕಾಸಂಗ ಕವಾಸ್
ವಾರಸ್ತಾರ್ ವ್ಹವುನಾಯಿ ಮನ್ವನ್ ಸಾಂಗ್ತ.

31 ಬನ್ನಿ ಬಾವ್ವಾನು, ಆಮಿ ಚಾಕ್ರಿನಿಚಿ ಪೊರನವ್ವ ಸ್ವತಂತ್ರಿಚಿ ಪೊರ
ಜಾಲ್ಯಾವ್.

5

ಕ್ರಿಸ್ತಾಪ ಸ್ವತಂತ್ರ

1 ಕ್ರಿಸ್ತಾನಿ ಆಮಾನಾ ಸ್ವತಂತ್ರಿ ರಾಹ್ಯಾವ್ವಯಿ ಮನ್ವನ್ ಸುಟ್ಕಿ
ಕಿಲಿತ. ತ್ಯಾತ್ ಘಟ್ ಉಬಿರಾವ್ವಾ ಗುಲಾಮಾಚಾ ತಾಬ್ಯಾತ್ ಆನಿಕ್
ಗಾಹುನಕೊಸಾ.

2 ಬಗಾ, ಪೌಲ್ ಮಂಥ್ಯಾಲಾ ಮೀ ತುಮಾನಾ ಸಾಂಗ್ಲೊ, ತುಮಿ
ಮುಂಜಿ ಕರುನ್ ಗೆತಲ್ಯಾವ ಕ್ರಿಸ್ತಾಪ್ಪಿ ತುಮಾನಾ ಕ್ಯಾಪ್ಯಾಯ್ದಾನಾಹಿ ನವ್ವ.

3 ಮುಂಜಿ ಕರುನ್ ಗೆತ್ಯಾಲ್ಯಾ ಪರ್ತೆಕಾಲಾ, ತು ಧರ್ಮಶಾಸ್ತ್ರಾರಾತ್
ಸಾಂಗ್‌ಲ್ಯಾಲ ಸಗ್ಳೆ ಕರಾಚಾ ಲಾಜಿಮಾತ್ ಹಾಸ್ ಮನ್ವನ್ ಪರ್ತುನ್
ಖರ್ಚ್‌ನಿ ಸಾಂಗ್ಲೊ.

4 ತುಮ್ಜಾತ್ ಕೊನ್ ಕೊನ್ ದರ್ಮಶಾಸ್ತ್ರಾರಾನಿ ನೀಯತಿಚ್
ವ್ಹಯಾವ್ವಯಿ ಮನ್ವನ್ ಮನ್ ಕರ್ತಾಸಾ ತೀ ಕ್ರಿಸ್ತಾಪ್ಪಿ ಯಗಾಳ್ಕಾಲಿ
ಜಾಲ್ಯಾಸಾ. ಕ್ರಪೆತ್ನಿ ಮಾಗ ಗೆಲ್ಯಾಲಿ ಜಾಲ್ಯಾಸಾ.

5 ಆಮಿತರಿ ದೇವಾಚಾ ಆತಮ್ಯಾಸ್ ಲಾಗುನ್ ಇಸ್ವಾಸಾನಿ ನೀಯತಿಚ್ಚ ವ್ಹತಾವ್ ಮನ್ವನ್ ಆಶಾ ಪುರಿವ್ವನಾರ್ ಮನ್ವನ್ ವಾಟ್ ಬಕ್ತಾವ್.

6 ಯೇಸು ಕ್ರಿಸ್ತಾಪ ಆಸ್‌ಲ್ಯಾಲ್ಯಾನಾ ಮುಂಜಿ ಜಾಲಿತರಿ ನಾಹಿ ಜಾಲಿತರಿ ಪ್ಯಾಯ್ದಾನಾಹಿ, ಪನ್ ತ್ಯಂಚಿಪ ಮಾಯೆನಿ ಯತ್ಯಾಲಾ ಇಸ್ವಾಸುಸ್ ಪ್ಯಾಯ್ದಾ ಜಾಲ್ಯಾ.

7 ಚಾಂಗ್ಲಿಚಾಲತಾಸಾ. ಫನ್ ತುಮಿ ಖರೈಶಾರ್ಕ್ ಚಾಲುನಾಹಿ ಆಸ ತುಮಚ್ ಮನ್ ವಳಿವ್‌ಲ್ಯಾಲ ಕುನಿ?

8 ಹ್ಯ ಮನ್ ವಳ್ವಾಚ್ ತುಮಾನಾ ಹಾಕಟ್‌ಲ್ಯಾಲ್ಯಾಪ್ಪಿ ಆಲ್ಯಾಲ ನವ್ವ.

9 ಥೊಡ್ಯಾ ಆಮ್ಚಾನಿ ಪೀಟ್ ಸಗ್ಳೆ ಆಂಬಾಟ್ ವ್ಹತ್ತೆ.

10 ಪ್ರಭುಪ ತುಮ್ಚೆ ಗುಸ್ತಿತ್ ಮನಾ ಇಸ್ವಾಸ್ ಹಾ. ತುಮ್ಚಾತ್ ಗೊಂದೊಳ್ ಆನ್ನಾರಾ ಕೊನ್ ಆಸ್ಲಾತರಿ, ತ್ಯಲಾ ಶಿಕ್ಷಾ ವ್ಹನಾರ್.

11 ಬನ್ನಿ ಬಾವ್ತಾನು, ಮೀತರಿ ಮುಂಜಿ ವ್ಹಯಾವ್ಹಯಿ ಮನ್ವನ್ ಆಜುನ್ ಸಾಂಗ್‌ತ್ಯಾಲಾ ಜಾಲ್ಯಾವ ಮನಾ ಜಾಚ್ ವ್ಹಯಾಚಾ ಕಾ? ತಸ ಆಸ್ತಾನಾ ಶಿಲ್ವೆಸ್ ಲಾಗುನ್ ವ್ಹನಾರಾ ತರಾಸ್ ಸಪ್ಲಾನವ್ವ?

12 ತುಮಚಾ ತಳ್ತಳಾ ಕರ್ನಾರ್ಯಾನಿ ಆಪ್ಲ ಆಂಗ್ ಆಪ್ನುಸ್ ಕಾಪುನ್ ಗೆತಲ್ಯಾವ ಬರ.

13 ಬನ್ನಿ ಬಾವ್ತಾನು, ತುಮಿ ಸ್ವತಂತ್ರಿ ವ್ಹಯಾವ್ಹಯಿಸಾ ಮನ್ವನ್ ದೇವಾನಿ ತುಮಾನಾ ಹಾಕಟ್ಲೆ ಫನ್ ತುಮಚ್ ಸ್ವತಂತ್ರ ಶರೀರಾಚಾ ಸ್ವಬಾವಾ ಶಾರ್ಕ್ ವಾಪ್ರಾಚೆ ಆಂದಿ, ಮಾಯೆನಿ ಯಕಾಮಕಾಚಿ ಚಾಕ್ರಿ ಕರಾ.

14 ತುಜಾ ಸೇಚಾರ್ಯಾಚಿ ತುಜೆಗತುಸ್ ಮಾಯಾಕರ್ ಮಂಥ್ಯಾಲ್ಯಾ ಯಕಾಸ್ ಸಬ್ದಾತ್ ಧರ್ಮಶಾಸ್ತ್ರಾರ್ ಅಡ್ಕುನ್ ಹಾ.

15 ಫನ್ ತುಮಿ ಭನಾವಾರಾಚೆಗತ್ ಯಕಾಮಕಾಲಾ ಚಾವುನ್, ಫಾಟುನ್, ಖಾತ್ಯಾಲ ಜಾಲ್ಯಾವ ಯಕಾಮಕಾಪ್ಪಿ ಮರುನ್ ಭಾಸಿಲಾ ಹುಶಾರ್ ರಾವ್ತಾ.

ಪವಿತ್ರಾತ್ಮ ಆನಿ ಮಾನ್ಸಾಚಾ ಸ್ವಬಾವ್

16 ಮೀ ಸಾಂಗಾಚೆ ಕ್ಯಾ ಮಂಜೆ ಪವಿತ್ರಾತ್ಮಾಚೆಗತ್ ಚಾಲಾ, ತವಾ ತುಮಿ ಶರೀರಾಚಿ ಆಶಾ ಭರಾಬಿ ಕರಿತ್ನಾಹಿಸಾ.

17 ಕಾ ಮಂಜೆ ಶರೀರಾಚಿ ಆಶಾ ಆತಮ್ಯಾಲಾ ಆಡ್ಣಿ ಭಾಲೆ. ಆತಮ್ಯಾಚಿ ಆಶಾ ಶರೀರಾಲಾ ಆಡ್ಣಿ ಹಾ ತುಮಿ ಕರಾಯಾವ್ವಯಿ ಮಂತ್ಯಾಲ ಕರಾಚೆ ಆಂದಿ ಹೀ ಯಕಾ ಮಕಾಚೆ ಆಡ್ಣಿ ಹಾತ.

18 ಫನ್ ತುಮಿ ಆತಮ್ಯಾನಿ ಚಾಲ್ವಾಚೆ ಚಾಲ್ಯಾವ ಧರ್ಮಶಾಸ್ತ್ರಾರಾಚಾ ತಾಬ್ಯಾತ್ನಾಹಿಸಾ.

19 ಆಮ್ಚಾ ಶರೀರಾಚೆ ಸ್ವಬಾವ್ ದಿಸತ್ಯಾಲ್ ಹಾತ, ತೇ ಕಚೆ ಮಂಜೆ, ವ್ಯಭಿಚಾರ್, ಬಾಹಿರ್ಲಿ ಸಂಗತ್, ಲಾಭಚೆ ಕಾಮ್,

20 ಪಾಶಾನ ಪುಜಾಚಿ, ಫಾಡ್ಪನ್, ವಾದ್, ಕಳ್, ಖೊಟಫನ್, ರಾಗ್, ಬೇಧ್‌ಬಾವ್, ಬಿನ್ನಮತ್,

21 ಡಾವ್, ಪಿದೊಡ, ಗೊಂದೊಳ್, ಉದ್ಯ ಆಸ್ಲಿಸ್. ಆಸ್ಲಿ ಕಾಮ ಕರ್ನಾರ ದೇವಾಚಾ ರಾಜಾಚೆ ವಾರಸ್ತಾರ್ ವ್ಹಯಿತ್ನಾಹಿತ ಮನ್ಹುನ್ ಮೀ ಹ್ಯಚೆ ಆಂದಿ ಸಾಂಗ್‌ಲ್ಯಾಸಾರ ಆತಾಬಿ ತುಮಾನಾ ಹುಶಾರ್ಕಿ ದೆತೊ.

22 ಫನ್ ದೇವಾಚಾ ಆತಮ್ಯಾಚೆ ಫಳ್ ಕ್ಯಾ ಮಂಜೆ, ಮಾಯಾ, ಆನಂದ, ಸಮಾಧಾನ್, ಧಂಡ್ಪನ್, ದಯಾ, ದುಸರ್ಯಾನಾ ಮಜ್ಜತ್ ಕರಾಚಿ, ಇಸ್ವಾಸ್,

23 ಸಾಬಫನ್, ಆಪ್ಲ ಮನ್ ಆಪ್‌ಲ್ಯಾ ತಾಬ್ಯಾತ್ ಥೆವಾಚೆ. ಹ್ಯಂಚೆ ಆಡ್ಣ ಕಚೆಸ್ ಧರ್ಮಶಾಸ್ತ್ರಾರ್ ನಾಹಿ.

24 ಕ್ರಿಸ್ತ ಯೇಸುಪ ಆಸ್‌ಲ್ಯಾಲಿ ಆಪಲ್ಯಾ ಶರೀರಾಚಿ ಭಾವ್ನಾ ತ್ಯಚಿ ಆಶಾ ಕರಾಚಿ, ಹೌರ್ಯಾ ಪನಾ ಸಕಟ್ ಶಿಲ್ವೆವ ಗಾಲ್ವಾರಿ ಚಾಲ್ಯಾತ್.

25 ಆಮಿ ಆತಮ್ಯಾಸಾರಾ ಜಿವ್ನ್ ಕರ್ತ್ಯಾವ್ ಮನ್ಹುನ್ ತ್ಯಚೆಗತ್ ಚಾಲುಯಾ.

26 ಬಡಾಯಿ ಕರ್ನಾರ, ಯಕಾಮಕಾಲಾ ಚಿಡಿವ್ವಾರ, ಯಕಾಮಕಾವ ರಾಗ್ ಕರ್ತ್ಯಾಲ ವ್ಹಯಾಚೆ ಆಂದಿ ರಾಹುಯಾ.

ಯಕಾ ಮಕಾಚ್ ವಜ್ಜ ವಾಟುನ್ ಗೆವ್ವಾ

1 ಬನ್ನಿ ಬಾವ್ವಾನ್, ತುಮ್ಮಾತ್ ಕೊನ್ನರಿ ಕಸ್ಲೆತರಿ ಚುಕಿತ್ ಗಾವಲ್ಯಾಲಾ ಆಸ್ಲಾತ ತಸ್ಲಾಲ್ಯಾಲಾ ಆತಮ್ಯಾನಿ ಬರ್ಲ್ಯಾಲ ತುಮಿ ಥಂಡ್ವನಾನಿ ಸಾಂಗುನ್ ಶಾರ್ಕಾ ಕರಾಯಾ ವ್ಹಯಿ, ಫನ್ ತುಮಿ ಪರೀಕ್ಷೆತ್ ಗಾವ್ವನಾಹಿ ಆಸ ತುಮ್ಮೆ ಗುಸ್ತಿತ್ ಹುಶಾರ್ ರಾವ್ವಾ.

2 ತುಮಿ ಯಕಾಮಕಾಚ್ ವಜ್ಜ ಉಚ್ಚುನ್ ಗೆವಾ, ಆಸ ಕ್ರಿಸ್ತಾಚ್ ನೇಮ್ ಪುರ್ತಿಕರಾ.

3 ಕಾ ಮಂಜೆ ಕಚಾನಿ ತರಿ ಬಾರಿಕ್ ರಾಹುನ್ ಆಪ್ಲು ಮೊಟಾ ಮನ್ವುನ್ ಯವಜ್ಲೆಲ್ಯಾವ ಆಪ್ಲ್ಯಾಲಾಸ್ ಆಪ್ಲು ಪಸಿವಲ್ಯಾಚೆಗತ್ ವ್ಹನಾರ್.

4 ಪರ್ತೆಕಾನಿ ಆಪ್ಲು ಕೇಲ್ಯಾಲ್ಯಾ ಕಾಮಾಚಿ ಪಾರಕ್ ಕರಾಯಾ ವ್ಹಯಿ. ತವಾ ತ್ಯೊ ಆಪ್ಲ್ಯಾಲಾ ಆಪ್ಲುಸ್ ಮೊಟಾ ಮನ್ವುನ್ ಗಿಹ್ಯಾವ್ವಯಿಲ್ ಖರ ಆನಿಯಕಾ ಸಂಗ ಮಿಳುನ್ ಮೊಟಾ ವ್ಹಯಾ ವ್ಹಯಿ ಮನ್ವುನ್ ನಾಹಿ.

5 ಕಾ ಮಂಜೆ ಪರತೇಕಾನಿ ಆಪ್ಲ ವಜ್ಜ ಆಪ್ಲುಸ್ ಗಿಹ್ಯಾವ್ವಯಿ.

6 ಕ್ರಿಸ್ತಾಚಾ ಸಂದೆಶ್ ಸಿಕ್ಕಾರ್ಲ್ಯಾನಿ, ತ್ಯ ಸಿಕ್ಕಿವ್ವಾರ್ಲ್ಯಾಲಾ ಆಪ್ಲಿಪ್ ಆಸ್ಲ್ಯಾಲ್ಯಾ ಸಗ್ಳಾ ಚಾಂಗಲ್ಯಾತ್ ವಾಟ್ಲಿ ದಿಯಾವ್ವಯಿ.

7 ಪಸುನಕೊಸಾ. ದೇವಾಲಾ ನಿಂದಾ ಕರಾಯಾ ವ್ಹಯಿತ್ವಾಹಿ. ಮಾನುಸ್ ಆಪ್ಲು ಕ್ಯಾ ಪೆರ್ತೊ ತ್ಯಸ್ ಕಾಪಾಯಾವ್ವಯಿ.

8 ಆಪ್ಲ್ಯಾ ಶರೀರಾಚಿ ಬಾವ್ವಾ ಪೆರ್ನಾರಾ ತೆ ಬಾವ್ವಾನಿಸ್ ಹಾಳ್ ವ್ಹನಾರ್. ಆತಮ್ಯಾಚಿ ಗುಸ್ತಿತ್ ಪೆರ್ನಾರಾ ಆತಮ್ಯಾಪ್ಪಿಸ್ ಶಾಶ್ವತ್ ಜೀವ್ ಗೆನ್ನಾರ್.

9 ಬರ ಕಾಮ್ ಕರಾಯಾ ಕಂಟಾಳಾ ಕರಾಚೆಆಂದಿ ರಾಹುಯಾ. ಕಾಮಂಜೆ ಮನಾತ್ ಬೆಜಾರ್ ನಸ್ಲ್ಯಾವ ಶಾರ್ಕ್ಯಾ ಯಳಾಲಾ ಪೀಕ್ ಗಾವ್ವಾರ್.

10 ಮನ್ವುನ್ ಯೊಳ್ ಗಾವಲ್ತವಾ ಸಗ್ಳಾನಾ ಬರ ತ್ಯ ಕರುಯಾ, ಲ ಕರುನ್ ಯಕಾ ಗರ್ಡ್ಡತ್ ಆಸ್ಲ್ಯಾಚೆಗತ್ ಆಸ್ಲ್ಯಾಲ್ಯಾ ಕ್ರಿಸ್ತ ಇಸ್ವಾಸಿನಾ ಕರುಯಾ.

ಸರ್ತ್ಯಾ ಹುಶಾರ್ಕಿ ಆನಿ ನಮಸ್ಕಾರ್

11 ಹಬ, ಮಾಜಾ ಹಾತಾನಿಸ್ ಕೃವ್ವಿ ಮುಟಿ ಆಕ್ಷಾರ ತುಮಾನಾ ಲಿವ್‌ತ್ಯೊ!

12 ಶರೀರಾಲಾ ಮರ್ರ್ಯಾದ್ ವ್ಹಯಿ ಮಂಥ್ಯಾಲ ಮುಂಜಿ ಕರುನ್ ಗಿಹುಂತ ಮನ್ವುನ್ ತುಮನಾ ಭುಲ್ಮಿ ಕರ್ತ್ಯಾತ ಕಾ ಮಂಜೆ ಕ್ರಿಸ್ತಾಚೆ ಸೇವೆಸ್ ಲಾಗುನ್ ತಿತಲ್ಯಾನಾ ಜಾಚ್ ವ್ಹಯಾ ನಕೊ ಮನ್ವುನ್ ತ್ಯಂಚೆ ಮನ್ವು.

13 ಮುಂಜಿ ಕರುನ್ ಗೆತ್ಯಾಲಸ್ ಧರ್ಮಶಾಸ್ತ್ರಾರಾಚೆಗತ್ ಚಾಲತ್ ನಾಹಿತ. ತೇ ಆಪ್ಲೆ ಸಿಲುಬೆಚೆ ಗುಶ್ಟಿತ್ ಮೊಟೆ ಮನ್ವುನ್ ಗಿಹ್ಯಾತುಮಾನಾ ಮುಂಜಿ ವ್ಹಯಾ ವ್ಹಯಿ ಮನ್ವುನ್ ಮನ್ ಕರ್ತ್ಯಾತ.

14 ಮನಾ ತರಿ ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚೆ ಶಿಲುಬೆಚೆ ಗುಶ್ಟಿತ್ ಮನ್ವುನ್ ದುಸ್ಮಾರ್ಯಾ ಕಸ್ಯಾತ್ ಮೊಟೆ ಮನ್ವುನ್ ಗಿಹ್ಯಾಚೆ ನಕೊ ಮನ್ವುನ್ ಮಿ ದುನೆಲಾ, ಆನಿ ದನಿಯಾ ಮಾಜಿಸಾಟಿ ಶಿಲ್ಬೆವ ಮೇಲೆ.

15 ಮುಂಜಿ ಕರುನ್ ಗಿಹ್ಯಾಚಿ ಕ್ಯಾನಾಹಿ ಕರುನ್ ಗಿಹ್ಯಾಚಿ ಮುಖ್ಯೆನವ್ವೆ ನವಿನಿ ಉತ್ಪನ್ ವ್ಹಯಾಚೆಸ್ ಮುಖ್ಯೆ ಜಾಲ್ಯಾ.

16 ಹ್ಯಾ ನೇಮಾಶಾರ್ಕ ಚಾಲತ್ಯಾಲ್ಯಾ ಸಗ್ಳಾನಾ ಆನಿ ದೇವಾಚಾ ಇಸ್ತಾಯಲ್ ಲೊಕಾನಾ ಥಂಡ್ವನ್, ಕರುನಾ ಗಾಹುನಿ.

17 ಹಿತ್ಲಿ ಮೊರ್ದುಕುನಿ ಮನಾ ತರಾಸ್ ಕರುನಾಹಿ, ಮಾಜಾ ಶರೀರಾವ ಯೇಸು ಕ್ರಿಸ್ತಾಚಿ ವಳಕ್ ಕರುನ್‌ಗೆತ್ಲೆ.

18 ಬನ್ವಿ ಬಾವ್ತಾನು, ಆಮ್ಚಾ ಯೇಸು ಕ್ರಿಸ್ತಾಚಿ ಕ್ರಪಾ ತುಮ್ಮಾ ಆತ್ಮಾ ಸಂಗ ರಾವ್ತಾನಿ. ತಸಸ್ ವ್ಹವುನಿ.

ದೆವಾಜಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಜಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಜಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922